



MENTERI KANAN PERTAHANAN  
MALAYSIA

## KENYATAAN MEDIA

### A. PERKEMBANGAN PROJEK JIWA MURNI KEMENTERIAN PERTAHANAN

1. Hari ini saya turun padang bagi meninjau sendiri perkembangan terkini pelaksanaan Projek Jiwa Murni Kementerian Pertahanan bagi tahun 2021 **yang juga merupakan salah satu inisiatif saya sebagai Menteri Kanan Pertahanan di bawah Aspirasi Keluarga Malaysia (AKM) 100 hari**. Tinjauan ini penting untuk saya memastikan projek yang dilaksanakan demi membantu golongan asnaf dan fakir miskin ini berjalan lancar dan dilaksanakan dengan sebaik mungkin.
2. Sehubungan itu, sebentar tadi, saya telah merasmikan sebuah Projek Jiwa Murni yang melibatkan kerja-kerja membaik pulih rumah seorang penduduk di Kampung Sri Tambak ini. Rumah yang dibaik pulih ini milik **Puan Juriah Binti Amat Saat**. Ia telah dilaksanakan dalam tempoh 2 minggu bermula 20 September 2021 dan siap sepenuhnya pada 18 Oktober 2021.
3. Tahun ini sebanyak **107 Projek Jiwa Murni** telah disahkan pelaksanaannya di seluruh negara melibatkan kos keseluruhan RM1.68 juta. Projek-projek ini termasuklah projek pembinaan baharu, baik pulih dan senggaraan melibatkan kediaman milik individu awam termasuk veteran Angkatan Tentera Malaysia (ATM) serta bangunan komuniti masyarakat setempat.



MENTERI KANAN PERTAHANAN  
MALAYSIA

## KENYATAAN MEDIA

### **B. BAJET 2022 UNTUK KEMENTERIAN PERTAHANAN**

4. Kementerian Pertahanan dan ATM menyambut baik peruntukan yang diumumkan oleh Menteri Kewangan, YB Senator Tengku Datuk Seri Utama Zafrul bin Tengku Abdul Aziz untuk sektor pertahanan dan keselamatan negara dalam pembentangan Bajet 2022 yang inklusif dan menyeluruh semalam.
5. Secara keseluruhannya, **Kementerian Pertahanan diperuntukkan sejumlah RM16.14 bilion untuk tahun 2022**, iaitu meningkat sebanyak kira-kira 1.78 peratus (%) berbanding peruntukan tahun lalu. Daripada jumlah ini, sebanyak **RM11.10 bilion diperuntukkan untuk Perbelanjaan Pengurusan (OE)** dan **RM5.04 bilion diperuntukkan untuk Perbelanjaan Pembangunan (DE)**.
6. Lebih bermakna, **peruntukan yang diterima oleh Kementerian Pertahanan tahun ini merupakan jumlah yang tertinggi sejak Rancangan Malaysia ke-9 (RMke-9)**. Dengan peruntukan yang besar ini, ia bukan sahaja membolehkan Kementerian Pertahanan meneruskan pelaksanaan inisiatif dan projek-projek sedia ada, malah meningkatkan lagi pelaksanaan inisiatif dan projek baharu merangkumi pelbagai agenda di bawah Teras-Teras Utama Kementerian Pertahanan.
7. Bagi **AGENDA KESIAGAAN**, Kerajaan telah **memperuntukkan sejumlah RM4.54 bilion khusus untuk perbelanjaan berkaitan aset**. Penting untuk saya maklumkan, **peruntukan ini meningkat 87% berbanding RM2.42 bilion tahun lalu**. Peruntukan yang ditambah ini sememangnya penting dan selari dengan perancangan Kementerian Pertahanan untuk meningkatkan lagi usaha dalam memenuhi keperluan aset bagi ketiga-tiga cabang perkhidmatan ATM.



MENTERI KANAN PERTAHANAN  
MALAYSIA

## KENYATAAN MEDIA

8. **Selain aset, peruntukan Bajet 2022 turut akan digunakan untuk penggantian peralatan.** Ini termasuklah peralatan utama Pasukan Khas Laut (PASKAL) dan Pasukan Khas Udara (PASKAU) melibatkan jumlah peruntukan sebanyak RM14 juta. Kerajaan juga bersetuju untuk memperuntukkan sebanyak RM25 juta bagi program menangani keusangan sistem yang melibatkan aset-aset Tentera Laut Diraja Malaysia (TLDM).
9. Bagi **AGENDA KEBAJIKAN**, peruntukan Bajet 2022 semestinya akan dimanfaatkan sepenuhnya demi meneruskan usaha **menyediakan kediaman yang lebih selesa kepada anggota, veteran ATM dan warga awam Kementerian Pertahanan.**
10. Sehubungan itu, Kerajaan telah memperuntukkan sebanyak **RM23 juta khusus untuk melaksanakan penggantian perabot di Rumah Keluarga Angkatan Tentera (RKAT)** yang mana ia selari dengan hasrat yang saya suarakan semasa sesi libat urus Bajet 2022 bersama Menteri Kewangan. Untuk makluman, tiada peruntukan seumpama ini dalam Bajet tahun lalu. **Tidak sekadar itu, Kementerian Pertahanan juga akan meneruskan inisiatif berkaitan RKAT termasuk senggara dan bina baharu. Ini termasuklah melalui peruntukan RM388 juta dalam Bajet 2022 khusus untuk RKAT.**
11. Bagi **AGENDA PENDIDIKAN** pula, Kementerian Pertahanan akan memberi tumpuan terhadap usaha **membaik pulih dan menambah infrastruktur baharu di sekolah-sekolah dalam kem ATM.** Ini penting demi menyediakan perkhidmatan pendidikan yang terbaik kepada anak-anak warga ATM.



MENTERI KANAN PERTAHANAN  
MALAYSIA

## KENYATAAN MEDIA

12. **Bagi AGENDA SAINS DAN TEKNOLOGI**, Bajet 2022 memperuntukkan sebanyak **RM40.7 juta** bagi pembangunan penyelidikan sains dan teknologi pertahanan yang akan dilaksanakan oleh Institut Penyelidikan Sains & Teknologi Pertahanan (STRIDE).
13. Secara keseluruhannya, bagi pihak seluruh warga Kementerian Pertahanan dan ATM, saya menzahirkan setinggi-tinggi penghargaan dan terima kasih kepada Kerajaan khususnya YAB Perdana Menteri dan Kementerian Kewangan atas peruntukan kepada sektor keselamatan dan pertahanan dalam Belanjawan kali ini. Ia bukan sahaja menyerlahkan keprihatinan Kerajaan terhadap aspek kebajikan anggota dan veteran ATM yang juga merupakan sebahagian **Keluarga Malaysia**.
14. Malah, ia turut membuktikan bahawa Kerajaan sentiasa komited untuk memantapkan lagi sektor pertahanan dan keselamatan negara. InsyaAllah, saya bersama kepimpinan tertinggi Kementerian Pertahanan dan ATM akan berusaha sedaya upaya agar peruntukan ini dimanfaatkan dengan telus, berhemah dan berintegriti demi kepentingan tanah air tercinta.

**YB DATO' SERI HISHAMUDDIN TUN HUSSEIN**

**MENTERI KANAN PERTAHANAN**

**30 OKTOBER 2021**